

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 商家 本本书店
内容不排斥 转载、转发、转卖 行为
但请勿去除文件广告宣传页面

若发现去宣传页面转卖行为，后续广告将以上浮于页面形式添加

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



近代中國史料叢刊第五十四輯

沈雲龍主編

無錫楊仁山（楷）先生遺著

楊曾勛輯

文海出版社
印行

無錫楊仁山先生遺著

辛丑秋日



無錫楊仁山先生
十七歲時所攝之遺容
(公元一九二五年)

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 商家 本本书店
内容不排斥 转载、转发、转卖 行为
但请勿去除文件宣传广告页面

若发现去宣传页面转卖行为，后续广告将以上浮于页面形式添加

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



先府君行狀

無錫楊曾易平苗氏恭述

先府君諱道霖字仁山原諱楷字端書姓楊氏世居無錫縣城學宮西側先高祖伯吹公諱德瑱官至廣東佛山同知生二子先會祖文威公諱鉞其長也配先會祖妣顧太恭人士族女生先王父秋苑公諱春池先會祖年二十五卒先會祖妣早寡有淑行下撫先王父荼苦備嘗以教以育至於成立當是時門庭衰微一線如縷垂今得不絕者皆先會祖妣苦志之力也先會祖妣年七十三卒先王父後官浙江海甯知州以清正忤大府旨去官年五十九卒配先王母顧太淑人爲先會祖妣女姪側室二仲太孺人陸太孺人子十先府君於昆季中行八先王母奉姑惟謹相夫以禮教子有方而治家整齊內外井然又善知文嘗親授先府君昆季讀一燈如豆書聲至午夜不輟雖嚴師亦無是過也後先王父十年卒年七十有三府君幼而聰穎孝弟性成爲先王父母所鍾愛四歲入塾十歲卒九經十一始開筆爲文極精密條暢之綴十七游庠以第一名入泮十八讀經世文編海國圖志聖武記盡得邵陽魏氏之學數十年仕學工夫得力於此十九從上海龍門書院山長興化劉融齋太夫子熙載邑宰巴州廖養泉太夫子繪習性理之學沈潛默識身體力行同儕中年事最少而能獨得其宗受知同邑薛季懷太夫子福保講究修己治人之道觀其他一切詞章功名之說蔑如也已卯日本夷琉球爲冲繩縣府君知其野心未艾必爲中國大患乃作平夷三策同邑澹如秦公細業最爲激賞嘗品題梁溪七子各詠以詩府君卽其一也壬午秋宅先王父憂明年春始謀出游之計佐天津道宣城景韓劉公樹堂幕於津沽甲申佐甯紹台道同邑叔

耘薛公福成幕於甯波其時中法連兵久不決甯波海口奉詔戒嚴府君適逢其會每觀大吏籌卒餉仰屋不知所計乃慨然憤曰中國地大物產富強之資奈何窮困若此於是深究近十年通商盈虧利病之道得知我國絲茶盛出以五年前所贏補五年後所絀耗銀至四千八百餘萬而俄美諸國互有虧絀惟英則無歲不贏且以鴉片輸入荼毒國人爲禍之烈固猶無已時也方府君初至甯波識歸安錢念劬先生恂抵掌談天下事語至相得因論光緒七年中俄伊犁之役兩國飭兵備邊事益棘而曾小侯馳一介之使與俄之君臣反覆詰難力持大體卒成改訂和約歸我伊犁之議且俄恒思拓境至地中海以通黑海之路而又日艷印度之富耽耽焉伺英之釁以圖一逞是俄之本志不欲在東而實務於西一明驗也正宜利其所趨以爲我用爰著光緒通商列表一卷自光緒元年乙亥以迄光緒十年甲申凡十年譜表十二卽於諸表之首繫以叙論都萬餘言而倡聯俄慕英之說惜時人多不察祇知謹守條約爲得計朝邑閻文介公敬銘方掌戶部見之甚爲贊許然不能用僅將列表存部飭屬按年做造而已我國有統計之學自此始戊子佐登萊青道常郡杏蓀盛公宣懷幕於烟台庚寅秋撰光緒十五年海關貿易冊書後痛陳總稅務司英人赫德伎倆之技揭破無餘一時士夫頗爲感動願赫德外恃英強內挾權貴終莫能去也赫德嘗私語人曰楊某如得大用不出三年吾曹無立足地矣其畏忌府君如此辛卯應順天鄉薦初擬中式第二名因主試徐侍郎樹銘以經文中有文襄既沒國勢驟衰二語之疑不可進呈御覽遂抑置十八魁後第十九名舉人壬辰春公車北上謁大學士閻文介公於津門慷慨爲論籌海之要鋒稜踔厲勢不可當文介危坐靜聽額汗淫淫下不覺以手自爪其面曰此關天下至計竟出諸一書生之口真

教朝廷大臣愧死矣三月會試經題禮記文兵車不中度不粥於市布帛精麤不中數幅廣狹不中量不粥於市見賞於大總裁壽陽祁文恪公子禾太夫子世長房考官諸暨陳蓉曙太夫子透聲中式第九十九名進士覆試二等殿試三甲第六十三名賜同進士出身朝考二等第五名引見籤分戶部學習主事府君嘗殿試時一腔忠愛之心毫無功名得失纖芥之意存於胸中窮一日之力仍遵常式每條到底暢所欲言直陳海軍不敢浪戰之弊皆對病發藥末論有英之爲我世仇如此股我膏血如此今乃忘仇結好甘爲外府而不自覺數語可爲懇切著明讀卷大臣高陽李鴻藻見之大怒謂新進士子瞻妄無忌諱至此擬置榜末旁有緩頰者謂其意無他不可毀其出身遂抑置三甲中間云五月得王母病危之耗倉皇出都二十一日抵家而王母已於十六日歿矣府君輒引爲終身恨事也先是府君里居時嘗默禱於惠山東嶽廟苟有科名必及老親見之會試既捷急修稟報王母王母時猶未病一日晝寢夢戶外有報鑼聲以爲府君捷也趨詢知他人乃悵然自語此兒純孝科名無分天道何不常至此比覺適府君捷稟至大喜卽親筆諭府君曰今日固知天待余不薄也無何遂病竟以不起然王母已及知府君科名之獲售矣其誠孝上格天神感應之際有如此是歲冬應湖北制軍南皮張文襄公之洞之聘爲自強書院商務教習兼辦督署文案申午服闋到部分發福建司學習是時常熟翁文恭公同蘇爲尙書極相倚重未幾卽調管北橫房中日之役我國海軍潰覆國勢岌岌朝臣依違和戰莫衷一是北洋大臣仁和王文韶欽差大臣節制關內外防剿各軍新寧劉坤一主持前敵戰務府君嘗論主戰以爲非戰不足以言和也嘗軸偉之派往津門參贊戎幕同幕有武毅歐陽君重先生錡奇俠之士博學多聞尤長論兵府君推心

相交訂爲知己皆行主戰因得多交湘友如程商霖觀察周章齋學士戴遂重太史曾慶壽都周敬夫內翰任壽文內翰其弟壽國及臨川李梅庵太史丹徒丁恒庵太史嘉興沈子培刑曹子封太史兄弟緒伯約給諫諸先生皆一時賢哲羣倡主戰意氣甚盛先是事起之始北洋大臣李鴻章一意主和出師屢敗惟德宗尙主力戰會牛莊失守湘軍受劾政府多惑和議李鴻章奉使日本類以危詞囑囑電一夕數至於是廷旨交王文韶劉坤一議決和戰府君與歐陽先生議津沽海口天險淺沙四五十里敵大艦不能近岸礮台林立敵若以小舟載渡我軍乘勢躉之可使全覆當申明軍法嚴定賞罰相持數月彼國黨禍內訌俟有勝勢乃可議和無大虧損深知王劉二人庸懦不足謀然機不可失激於義奮各懷匕首入謁陳說利害力請主戰聲淚俱下備極悲壯二人正相顧愕然未知所措適廷旨又至密示和意於是謾稱此乃皇上之意竟以海嘯成災天譴中國奏覆主和府君與歐陽先生卽夕痛哭回京歐陽先生落拓京邸生計甚困府君爲籌巨金入資簽分刑部主事羣友在都暇輒聚談朋友之樂益相親善悉呼府君爲八哥無敢私字之者府君在部每以國家度支出入散漫不可稽考爰立簿冊分門別類搜剔排比首創戶部會計之法湘鄉李希聖先生所輯光緒會計錄實係府君底本府君與李先生爲壬辰同年情好至密故示之也戊戌詔開京師大學堂管學大臣壽州孫文正公家蕪長沙張文達公百熙先後奏派府君爲史學掌故教習越年泗州胡芸楣侍郎樞案委令兼辦京津山海關內外鐵路總文案時詹天佑氏久隨洋工程師金達襄辦路工尙未有名會議接築京張鐵路府君與績溪邵班卿先生作舟力勸侍郎不用洋工程師專任詹氏辦理工程至路成而其名大著中國有鐵路人才蓋自此始庚子夏拳匪亂

事各國內犯府君時有密揭趙舒翹尙書論宜借禁鴉片進口以拒英離各國不令得合又馳書張文襄陳說其事皆未得覆乃匹馬至濟南見巡撫袁世凱力勸出兵趨直沽後分洋兵勢不使專向津京袁辭以軍械在小站全失無可戰蓋隱與各省主和李鴻章實爲之主正相結合將定也既而天津失守京師亦陷兩宮西狩長安於是和議竟成矣辛丑考取記名軍機章京癸卯詔開經濟特科長沙張文達公百熙侯官張文厚公亨嘉爭以府君名保送考取二等十五名引見題補戶部山西司主事宗室載振開辦商部題補保惠司員外郎甲辰奉部命赴長江一帶考察商情明年秋五大臣奏調隨使出洋留日半載著有日本統計類表要論十二卷都二十餘萬言考察彼邦政治軍事財政實業至爲詳贍實諸政府存備參考丙午正月京察保送一等七月返國調補平均司掌印八月旨准一等加一級交軍機處記名以道府用九月以出洋當差出力賞給三品封典丁未正月奏調農工商部農務司掌印員外郎五月奉諭補授廣西桂林遺缺知府六月謝恩召見一次兩宮溫語有加先是府君在東會上書載振直論本部振作少不如前宜加奮勵等語僉謂貝子厚君方將大用慮非所宜府君慨然言曰此正所以報貝子也卒爲權者所沮至於外謫而商部亦從此壞矣十一月抵桂卽補柳州府知府缺柳州多盜藪地瘠民貧號稱難治府君下車當兵燹後烟戶凋零瘡痍滿目益不勝光道州春陵之感嘗自謂柳地雖陋惟念王陽明在龍場于清端在羅城是何等氣象以之爲况勝彼已多既已到此且烈烈轟轟做他一場再說府治之懷遠縣四山環繞地實枯槁三江六甲三峒諸苗獨穴居其間析米而炊量鹽而食有老死未至縣庭者多種茶桐梓其油賴以爲生其用油榨如漢民碓磨家戶皆有出產甚微向祇徵出口一稅自朝廷立

憲命下大吏多主暴斂爲新政之階遂有油榨捐之設每榨每歲征銀二十元迫令苗民領帖承捐雖歲收油不及數十斤者亦無一能免而承辦員司恃威橫暴又時調弄苗婦羣苗正苦無所計會縣中籌設學捐上戶一元中戶六毫下戶二毫上戶中戶皆係富有之家至於下戶則大半貧無立錐挑柴賣水者富有之家而以一元六毫寬之貧無立錐挑柴賣水者而以二毫膏之於是有文生榮尙槐武生何明星例買馬遠義康生覃錦芳職員潘文仁潘建邦等爲首煽惑苗狗聚衆十萬於縣之古宜墟誓以砍樹毀榨與官吏同盡乃圍主簿署及統稅局並搗毀學堂將下攻縣城駐防保商營營長熱觀不敢動大府電撤府君偕同幫統長沙任壽國先生福黎迅速親往解散府君歷觀從前苗民滋事其始皆起於細微不至已激成往往釀成巨禍剿撫皆難下手又深知苗民本質樸陋怕官至激起事端則愚執性成難於馴服非有曉事官紳善於開導實未易消患未萌當遠飭飛告幫統並委巡檢趙君汝銘相偕先行馳赴督同辦理此戊申年正月十九日事也二十四日幫統巡檢馳抵古宜其時苗狗聚集墟上者尙止數千人餘皆陸續在途謠言四起勢甚危迫幫統卽分班傳見各頭目曉以禍福利害並許其如有寬抑代爲陳訴諸苗狗咸皆感泣服罪二十六日三江苗民首先解散二十八九兩日六甲三峒之苗亦陸續散去府君復爲申請大府酌減稅捐終府君之任苗狗未嘗滋事也兩粵著名巨匪郭三踞金秀豬在平樂府修仁縣界豬山最險絕高處號大元帥衆匪共推爲主分黨劫掠潯梧平柳四府州縣幾無虛日並勾結外來匪黨謀先據柳州起事官軍連年剿辦未能得手府君兼統親兵營二百四十人任幫統胡委員代銘實指揮之戊申正月在柳城太平墟緝到通匪駱四五月由駱四緝到麥亞威卽麥四爲郭三購運槍碼

接濟入山府君皆許其不死蕃爲線工令專探郭三動靜相報秋間胡委員進山駐象屬中平白丈一帶離金秀猶一百六七十里兩次冒險進搆立奇功未獲明年三月探得郭三將至柳城時管帶章君德助正駐柳城太平墟防匪府君因密屬多放偵探嚴密巡緝管帶派黃達仁挑雜貨擔至歐峒一路探匪適過峒口忽山際有人喚買近擔買去香油洋火因託無意詢問是何處大哥其人云是郭三大哥黃探伴爲恐怕即走遠窺其人果入峒內遂趕回墟報信時十八日將暮管帶得信一面傳團報縣卽令各勇做飯食畢開隊新雨之後忽星月朗朗越嶺三重越深水兩重涉淺至腹始過至四更行六十里始到歐峒布置四面路徑分勇登山把守粗定天已將明匪始驚覺不敢遽出相持至午後各團聞信始到將夜柳城陳令文裕亦到至下維村離峒三里遙爲聲援至二更許匪乘夜黑霧起竊窺突出什長鍾玉廷正勇黎得標首先抵禦中槍陣亡官軍四面兜擊傷匪倒地兩名訊係郭三及先鋒趙六遂行擒獲二十一日由章管帶陳令解送郭三到府府君親洩鞠訊直供不諱郭三正法之日兩粵官民杯酒致賀先是右江總兵李國治親統大軍至猶山一年餘未獲正匪至此匪首忽爲府君所得兩者相形在所不堪會柳城陳令出巡撫張鳴岐之門仗勢不奉法章管帶之擒獲郭三陳令實至下維村乃竟冒功上稟府君據理力爭以爲冒功事小足灰將士之心以後不能用人關係甚大張鳴岐李國治隱左袒之借端撤章管帶差府君知事不可爲一再求代張則假示慰留繼又縱使融縣南令岳峻亦爲其門生連命擅專遇事阻撓府君據實通電稟揭末云知府平生不畏強禦盡力國事身命不顧何有一官用是大拂張意幾登白簡己酉冬十一月乃浩然掛冠去合郡士民攀轅祖送咸謂賢太守去吾儕小民無安枕之日矣府君既

交篆先遣家眷由柳江赴梧相待府君陸路晉桂林謁上官假歸由西江南下至梧會合眷船開行不數里有小船中兩人甚精悍駛至詢問是否府官船家人實告之云我等特來護送詢問何人則云不必問府官自知先後隨行夜必登岸天明下船一日盜劫鄰數船而獨未犯及歷大藤峽紫荆山諸險明王陽明平峽賊及道光中洪楊所匿地兩岸叢山壁立江水湍曲天險皆匪窟至潯過碧浪灘兩人復來云以下一路平安無事請片刺辭去府君至梧家人述其所語詢何人則府君固不知也府君守柳二載凡有利民者必興之有害民者必革之廣開學校以期修明禮教創辦商會利在總縮貿易建立柳侯公園以與斯民共樂重修劉黃故墓志在表彰名蹟此特舉一二舉學大者其他政事多以標本兼顧寬猛兩濟爲主治匪雖嚴而常以情感巨匪郭三臨刑府君命備棺衾爲之殮葬羣匪無不感服故有護送之報也府君歸田未及二年而清社屋矣政體旣更殷憂益亟府君蒿目時艱慨然思所以快閱實業冀爲國家一吐積貧積弱之氣方其守柳時嘗見苗山大木本質堅韌遠勝洋木所苦無人啓伐多年委積一任腐朽深爲惋惜於是糾集股本創立華興木植總公司於上海專採苗木以抵制洋木爲宗旨呈准稅務處實行加稅免釐政策猝遇禍亂事遂停頓癸丑出任熱河實業廳長府君非願挂名於新朝仕版蓋痛惡袁世凱以巨奸盜國必思顛覆之有所爲而出此也當鼎革之際陝甘總督升允提兵三千遠走外蒙庫倫明示獨立其地正毗鄰熱河府君藉得秘相呼應而海內同志則有衡陽會農髯臨川李梅庵廈門辜鴻銘丹徒鮑潤漪同邑許靜山諸先生悉資府君以爲聯絡靜觀世變待機大舉豈意未及數月即被裁缺所圖不果廢然南歸重組木植公司廣西巡按使張鳴岐挾嫌搗阻幾經涉訟始行得直卒以資本短

細時局艱危遷延數年復告倒閉壬戌夏長沙任壽國先生以倡明孔道相招於是府君有三湘之游主
教湖南孔道學校爲期一月著有政治講義二編計十篇都七千言於處世立身經邦治國諸大端敘論
詳明皆爲平生心得之學厥後府君鑒於我國絲茶專恃銷售外洋其出口贏虧可以斷商業之興衰惟
向以默守成法不謀產銷改良遂爲日絲印茶剝蝕一蹶而不可收拾爰有整頓絲茶計畫呈請當道開
辦絲茶實業銀行改良絲茶產銷直接運洋之議此事官商皆知有利徒以官不能立信而商無此魄力
互相推諉迄於無成庚午五月遽嬰怔忡之症瞳子模糊步履趑趄起病勢甚殆醫者以爲用心過度氣血
兩虧所致府君體質素強遭遇坎坷志猶未已賴調攝得宜半年之間飲食眠起已能如恒方期怡養天
年克享大壽庸知竟於壬申九月十八日申時無疾而終距生於咸豐六年丙辰三月初六日寅時壽七
十有七嗚呼痛哉府君稟賦剛毅至老彌篤天性過人當屬續之晨猶詔不孝曾勗日念及王母卽須哭
矣言下哽咽一生志事恒以左文襄公自期丁逢叔世困於鄉原小人之手仕宦數十年以廉介自守親
友有急不稍吝色然未嘗屑屑以家事爲慮晚年益頹躓至於齋志以殉天也夫復何言先嫡妣劉淑人
先繼妣金淑人先庶妣胡孀人所生母許男四人長不孝曾勗娶高氏次不孝曾遜娶王氏三不孝曾湯
幼不孝曾復俱所生母許出女三人長適黃巖王亮劉淑人出次適如皋冒景瑜李待字俱所生母許出
不孝等追維先德用圖所以昭後取信故不敢飾虛詞以累府君謹灑血撰文平生行實伏冀
當代大人先生采擇而誌諸墓焉謹述

年愚弟鳳凰熊希齡頓首拜填諱

附錄長沙任壽國先生福黎慰唁函壬申

平苗世兄禮席月前得尊公噩耗甚爲悲悼昔日友朋自是盡矣天下之將亂則賢人志士必遭挫抑摧沮於時然後乃得成其禍勢也亦命也尊公一生志事專在救國忘身忘家僕知之最悉此時心緒極亂不能成文故輓詞唁信均於一二日內稍能定心方操筆從事前囑作墓誌銘僕本不文又貴省多大文學家尊公猶多良友此種埋幽之文傳僧後世非僕所能任也哀啓詳贍眞實卽此可知其能讀父書甚喜甚喜此時世兄責任益重母老弟幼謀生宜急前次熊老伯介紹商務印書館函已投謁否爲貧而仕抱關擊柝皆可供職切勿有所擇也戴遠倉郭復初諸公均早作古人尊公昔日良友零落將盡世兄宜從艱苦中求以自立不可大言高論如乃公也令弟於小學中學畢業後卽宜改習商務或職工不可再咀嚼文字讀書人終當餓死明大義足矣奚以深爲有志深造則於工商餘暇泛覽可也茲寄去布聯二件一係孔校一係僕者又奠儀二十元薄菲聊志哀悼而已又尊公舊刻左文襄公書牘節要板尙存否當時費四五百銀兩或售與上海各大書店或租與各書店印刷取其板資亦可稍佐家用如彼方不銷售亦可代向此間書店商置冬寒宜節哀順變以慰先志不宜卽頌禮祉任福黎拜啓十二月二日

湖南孔道學校校長彭清葵先生率全體教職員學生挽聯
喜爲賀耦耕魏默深諸先生冒數月擁皋比遽士至今懷泰斗
每有汲長孺包希仁古君子概一錢終屬續宦途誰與比清剛

長沙任福黎先生輓聯

文學師曾經濟師左義理師羅好賢樂善師胡夙與湘江衡嶽氣脈相通交契滿湖南意欲合天下英
豪挽迴厄運至此老成待盡到處傷心祇留得志壯山河光昭日月

通商病英黷武病倭險狠病法驕奢淫佚病美盱衡萬國五洲癘結所在著書餘仕學實能發當時聲
韻振起沉疴誰知陰霾彌空增茲多口幸尚有民懷樂利士感薰陶

恭緝 先柳州公遺著序

先公幼治詩古文辭比長奮志於經濟之學遂不屑屑以文章名世洎自柳州掛冠歸慨然思所以恢闢實業冀爲國家一吐積貧積弱之氣爰有木植絲茶兩大計畫以抵制洋貨挽回權利爲宗旨經二十餘年世方憤憤馴致公私交困迄未得行公平居恒以左文襄公自期丁逢叔季爲鄉原小人所扼嘗謂一生處境多走逆風其耿介之性從可見已夫子有言君子疾沒世而名不稱公非不知其時之不可爲而必強爲之者正復爾也然竟齎志以殉天乎痛哉公少壯所作惜大半燼於甲辰宅火晚年注力實業行役勞頓不遑寧止更無意於翰墨之事今所遺著有光緒通商列表一卷日本統計類表要論十二卷左文襄公書牘節要二十六卷柳州文牘二卷皆公手訂並早行世其未刊者不孝數年來恭爲蒐緝僅得詩一卷文一卷備遺忘集五卷華興木植公司案牘二卷議立絲茶銀行改良絲茶產銷直接運洋案牘一卷湖南孔道學校政治講義二卷日記一卷書牘一卷隨筆一卷而已昔司馬子長著史記自謂藏之名山傳諸後世古人重視立言爲不朽之業如此是豈公之始願哉雖然百世而下讀公之書必有傷公之遇而爲痛哭者矣夫爲人子而不能繼述先人之志事者罪莫大焉願自一息尙存此心寧敢斯須或忘耶丙子夏四月十有六日不孝長男曾勗恭序於白門客次

家藏先人手澤經丁丑倭禍盡毀無存而曾勗所蒐緝者前曾抄錄別置行篋幸得保全惟備遺忘集五卷未有副本竟散佚矣附記志痛己丑正月十六日曾勗謹識於粵東客邸

無錫楊仁山先生遺著

總目

- 一、文存
- 二、詩存對聯附
- 三、書牘
- 四、政治講義
- 五、日記
- 六、隨筆

長男曾勛恭輯

無錫楊仁山先生遺著

文存目次

長男曾勛恭輯

對策列第一

壬辰殿試策

會試制藝列第二

兵車不中度不粥於市布帛精麤不中數幅廣狹不中量不粥於市

奏疏列第三

甲午奏疏

告諭列第四

蒞任告諭合屬士民

卸任告諭合屬士民

序列第五

光緒通商列表自序

左文襄公書牘節要序

日本統計類表要論序

書後跋列第六

光緒十五年海關貿易冊書後

跋光緒十五年海關貿易冊書後

書辜鴻銘張文襄幕府紀聞後

條議列第七

籌辦森林事宜條議

推廣農田事宜條議

建議無錫急宜增設農事試驗場理由書

籌辦本縣清丈地畝議

勸辦錫邑常平桑末議

傳記列第八

思齋先生治寧遺蹟

祖德

記擒獲豬山首匪郭三本末

治柳記事七則

元配劉夫人事畧

雜著列第九

備遺忘集自序

驅邪檄文

書示師範畢業生將歸諸子

題明顧洞陽先生墨蹟

失題

文存補錄目次

洋關征收稅鈔分類總數表光緒通商十二表之一 高橋皇朝經世文獻編卷一百十五

無錫楊仁山先生遺著

文存

對策第一

壬辰殿試策

臣對臣聞聖王之治天下也必有長駕遠馭之術以安內而攘外當其時人主躬行於上六服承辟於下黎庶懷德戎貊畏威太平之治罔不繇此自通商事起爲千古未有之變局論中國事勢人民之衆物產之饒甲於五大洲上宜乎至富至強矣然而兵威未振國用日匱商民交困何也則以劫於條約太阿倒持事事反主爲客而商務虧絀以至此也醫者之治疾必視癥結所在而攻治之病去而元氣自復爲今計非臥薪嘗膽標本並治未易爲功欽惟

皇帝陛下以聖哲之資荷艱大之業揆文奮武勵精圖治茲當
臨軒發策猥以親禮邊防倉儲屯田諸大政垂詢芻蕘而終復
詔以毋泛毋隱則所以求直言者意甚盛矣臣惟自古對策之
善莫如漢董仲舒宋蘇軾文天祥明王守仁其後皆爲名
臣蓋本忠愛之心發爲剴切之論指陳利害可言可行臣
雖樸昧然束髮讀書近三十年蒿目時艱中夜扼腕今日
乃得一當敢披肝膽冒斧鑕直陳管見請先言治本伏讀
制策有曰西藏屏蔽川滇爲古吐蕃地而因考其沿革山川道
里之數此誠柔遠之至計也臣謹案藏地在唐時爲吐蕃
南境貞觀八年吐蕃入貢爲通中國之始地分四部中國
入藏孔道有三由陝西西寧府南行爲北路由四川打箭
鎗西行爲中路由雲南麗江府北行爲南路元憲宗始置
吐蕃宣慰司於碉門等處置六宣撫司世祖置烏斯藏郡

縣明洪武中復置指揮宣慰招討司阿耨達卽岡底斯山
爲蔥嶺東北最高峯雅魯藏布江源出達穆楚克喀巴布
山瀾滄江有二源一鄂穆楚河一匝楚河潞江一名怒江
源出布喀澤南流經雲南至緬甸入海天竺身毒皆印度
之轉音藏印之間小國惟廓爾喀稍足自保餘俱削滅矣
皇上奮威振武一旦命將由藏以臨印度固今日制敵一奇也
制策又以五禮之目賓居其一而因詳求朝覲之禮此誠御下
之要圖也臣謹案周禮大宗伯以賓禮親邦國其別有八
四朝者謂中朝外朝內朝詢事之朝皆爲周制五載一巡
守羣后四朝與禮記王制不同郊特牲旅幣無方節覲禮
侯氏奉玉帛以升文可證通典分四目言之特詳列邦聘
問三代下遂無其禮大都因時制宜禮固隨百王而定耳
皇上垂拱受治震盪萬邦四海雖遙有不來享來王恐後也哉

制策又以周官倉人廩人爲今京通倉之所由昉而因進求整
治之法此誠足食之先務也臣謹案周禮倉人廩人主粟
入藏穀之數至秦時有治粟內史漢初有治粟都尉後改
搜粟校尉隋有司農卿唐因之又有太倉令諸倉監監倉
御史元有京畿都漕運使明永樂中都北京置京通倉以
戶部司員經理之宣德五年命李昶爲戶部尙書督倉場
事明史食貨志攬運有郎中監倉有主事卽今坐糧廳及
倉場監督也近世海運旣行漕中數百年積弊蓋十革八
九偷漏之私蒸爛之患但當事者隨時整飭不患流弊日
滋至開畿輔之田紓東南輓運之勞實亦謀國之至計也
皇上廩念倉儲勤求民隱大法小廉而弊或有未祛無是理已
制策又以三代之盛寓兵於農而因講求屯田之法此誠安邊
之勝算也臣謹案軍屯守邊始於戰國至漢文帝募民耕

塞下而屯政漸備其後屯田西域者傳介子在伊循城常
惠將三校屯於烏孫赤谷鄯吉屯於渠犂車師在今闐展
烏魯木齊伊犁等地盡兵屯非民屯矣武帝始置中壘校
尉領護西域宣帝置司馬護南道鄯善以西諸國神爵三
年並護北道號曰都護趙充國屯湟中在今爲內省經畫
周詳後世言屯政者多宗之所謂內有無費之利外有守
禦之備威德並行兵農相輔老成謀國坐操全勝然力農
既久則操練易弛在爲將者以時肄習使士氣能常新也
皇上耕籍勸農蒐苗講武餉裕則兵精用以撻伐不庭無難耳
凡此皆治本之論也今天下受病之深而亟宜措意者患
不在俄美而在於英核計貿易總冊自光緒乙亥至己丑
凡十五年中外通商貨價出入贏絀之數中國共虧銀一
萬五千五百六十一萬餘兩至庚寅一歲英國贏銀至六

千八十萬四千三百一兩合之俄美等國補入中國之銀
二千三百四十一萬餘兩中國一歲虧銀至三千九百九
十四萬八千九百四十一兩國家致貧之故端由於此循
是不已更不知安所底止議者徒知俄之壤地扼我肩背
而不知英之商務已潰我心腹也日本小國洋藥一項猶
首在禁例堂堂中國之大受其毒而不敢置喙恥亦甚矣
以中國之全力禦各國則不足敵一國則有餘爲今之計
莫若聯德以制俄結俄以圖英何也德偏處強鄰恒思強
中國以制英法誠能結以大信共敦睦誼中德既親足以
握天下之樞俄必不敢東向俄豔印度之富終不能忘更
可共導其機使俄進兵南牧英俄既戰則中國邊俄之地
可以無虞英之兵勢十分六七中國乘機而起更立條約
盡力禁阻洋藥不得進口英屈於正理無辭以拒必能就

我範圍是在人爲之何如耳雖不戰而下亦無不可議者
又謂海軍初成未可輕言浪戰是自餒也漢元帝時國勢
至孱矣然陳湯矯命行師首斬郅支威行萬里近者法越
之役逮唐炯徐延旭罷潘鼎新而鎮南大捷賞罰明則將
無不奮在有以激勵之而效可立待也當庚申天津之役
文宗顯皇帝北狩灤陽海內臣民至今雨泣英之爲我世仇如此
朕我膏血如此今乃忘仇結好甘爲外府而不自覺此臣
所未解者也剛亦不吐柔亦不茹爲治之道是宜審已惟
陛下本至誠之德奮獨斷之明求人才振士氣神武雄畧一以
世宗憲皇帝爲法必有于謙張居正之相陳湯岳飛之將出於其
間用以鞭箠四夷振威銷萌庶幾國勢可振而外侮可除
此所謂癢結既去則元氣自復者也竊不揣冒昧輒推廣
聖問而以標本並治之說進焉於以整頓商務力謀富強則我

國家億萬年有道之長基此矣。臣末學新進罔識忌諱干冒宸嚴不勝戰慄隕越之至。臣謹對。

道霖辛卯壬辰鄉會試聯捷時光緒通商表既成之二年當殿試時一腔忠愛之懷毫無得失之心暢所欲言直陳海軍不敢浪戰之病皆對病發藥末論英之爲我世仇如此朕我膏血如此今乃忘仇結好甘爲外府而不自覺可爲懇切著明閱卷大臣李鴻藻見之大怒謂新進膽妄無忌諱至此欲置榜末有緩頰者云其意無他不可毀其出身遂置三甲中間朝考二等點分戶部主事京察簡放廣西桂林遺缺府知府補柳州府知府一生際遇如此而有清亡矣自記

會試制藝第二

兵車不中度不粥於市布帛精麤不中數幅廣狹不中量不粥於市

兵車布帛有定制。齊民之政在是已。蓋兵車所以示武。布帛所以爲用。惟不中度與數及量者。則不粥焉。王制齊民之政。於此一見。且聖王不講富強而未嘗不除貧弱。凡簡械紡績諸政。所以除貧弱而富強。亦卽寓乎其中。不此之講而徒一切苟且補苴之爲。致使國家可強可富之資。悉仰給於他人。不致貧與弱而不已。則未知王制齊民之道也。古者富藏於民。兵皆自賦。出於井田。九夫爲井。合六十四井。出兵車一乘。治賦多寡。以此推算。讀考工一記。凡匠民所經營者。皆有一定之經。而無敢或紊。則中度之說也。古者工出於女。衣之所被。皆由蠶績。朝服十五升。積千二百縷。爲布帛一端。其物貴賤。由此遞推。誦授衣一詩。凡織婦所料度者。皆有一成之法。而無敢或移。則中數與量之說也。有如兵車。其不中度者。則不粥於市焉。有如布帛。其精麤不中數幅廣狹不中量者。則不粥於市焉。凡此皆王制齊民之政。古之聖王。非不欲稍寬其制。特恐政令一弛。則凡業此者。皆得任其意之所爲。角智爭能。奇技淫巧。皆因此而起。不得不大爲之防。蓋以此也。且夫後世簡器之政。其效亦可觀矣。梯山航海之倫。方日炫其所長。以求通於學藝。金與火相激。而舟輿可廢。弓矢可廢。而驚其奇者。至欲弃前人之成法。而步武追隨。國家數十百萬貲財。而有所不顧。迨至莫售其技。則又詫爲巧。不可階而智力有所不逮。夫五金之產。何地藪有。而必聽其相度。以冀幸於一成而終於無效。亦思古之論兵。無大勝而亦無大敗。其維持元氣。不在強弱。而在仁暴。

也。兵車其一端也。且夫後世紡績之法其弊亦難窮矣。夸異鬥奇之輩方日呈其所有以爭勝於一時。商與工並重而動植有學。物性有學而驚其新者。至欲舍平日之服章而見異思遷。至歲費民間數千百萬金錢而不可復挽。迨至漏卮益多則又歎爲勢之所至而禁令有所不行。夫蠶桑之利本於土宜而必聽其低昂致奇贏之一繼而遂以不振亦思古之制產無至富而亦無至貧其綱紀人民不在豐嗇而在奢儉也。布帛其又一端也。

本房原批

禮記文按時立言於古今治亂盛衰之故洞悉原本其筆力亦縱橫馳驟逼似三蘇餘亦能推闡經旨不以撫拾爲工

聚奎堂原批

禮藝一篇讀訖令人掩卷慨然

奏疏第三

甲午奏疏

爲大臣奏報不實特派大員馳驛查辦親履前敵查究實情亟應分別嚴定賞罰敬陳管見伏乞聖鑒事竊維賞罰者馭下之大權至戰陣之事所關尤重必有功重賞有罪必罰庶軍心可振而寇氛自定此次海軍大東溝之戰北洋大臣李鴻章所報差爲不妄濟遠管帶方國謙正法人心大快亦賴洋員漢納根踴躍陳說提督丁汝昌等知不可掩飾始行直陳然臣等所聞尙有不止是者據英國所繪戰區招商局運兵圖南五艘進口下旋送兵登岸護送兵輪十艘列陣口外定遠濟遠超勇三船在左近岸鎮遠致遠等七船在右雷艇六艘在前平明日本兵船踵至截我歸路隊約可見丁汝昌恒怯不發一令漢納根趨令備戰手槍向丁汝昌作欲擊之勢丁汝昌始行傳令各船迎敵日本兵船十二艘未至三十餘里分陣以待會社所改兵船八艘又在後十餘里致遠鄧世昌船首先當敵注攻一大鐵艦連發兩砲一魚雷日艦隨行沈下爲日船聚砲猛擊受傷甚重鄧世昌發憤直前撞觸一敵艦未至亦沒濟遠遂退誤撞超勇沈沒丁汝昌發令禁之不止超勇爲濟遠撞沈定遠勢孤爲日船五艘環攻危險益甚幸左三號雷艇前救日艦分防雷艇定遠始得整砲還擊歸於右除揚威火起自午刻開戰至日交申海上烟雲障天不可辨識我軍凡沈四艘日本凡沈三艘所有各船皆身受重傷筋力俱疲然日船仍死戰未退會商輪兵至登岸乘潮出口日船望見以爲我生力軍至始惶恐東走我軍亦全軍西返日本深知我將帥懦怯欲乘

此全覆我軍計極狡悍幸漢納根奮勇趨戰鄧世昌首先破敵勝敗相當日人至此氣少挫矣至陸路牙山平壤各軍退走各情李鴻章所報有葉志超奇計脫險衛汝貴血戰三晝夜等事全是隱蔽毫無影響當高陞輪船沈沒牙山軍無後繼應嚴行固守平壤諸軍奮勇趨援併兵前進方合兵法葉志超聞信洵懼晝夜出營傳令各營隨行各營貿然不知所往沿途紛擊不復相顧軍火兵餉悉數委棄僅得身至平壤大營三哨三百餘人途中散失誤傳葉志超仍在牙山復行前往既至則空壁依然未見一倭人蹤跡又兩日而復出此牙山退軍之實在情形也衛汝貴僉王鄙劣之人未經戰陣結納李鴻章左右拜張佩綸門下自鴻章趙氏以至最下厮養皆饋遺豐厚爲延譽夏間李鴻章閱兵大沽盛軍將士環訴刻扣軍餉李鴻章一無究辦當盛軍出征天津人人決其必敗司道盡言規阻李鴻章皆置不聽所發整裝四萬八千兩衛汝貴匿其三萬以一萬八千分給各營將士憤然未至山海關勇丁在途逃散幾及千人衛汝貴皆暗行招募並缺額不補既至平壤各營聚處城中將士皆分住民房不歸行伍安坐一月有餘既不進軍又不設哨探一無守備馬毓崑自請扼盈德之險葉志超不許日兵自元山進攻先於城北高處創築砲台各營見之一時洶潰衛汝貴首先倡逃葉志超方在倡言聞之輕衣走出已勢如壞隄不可復止共失洋砲一百餘尊洋槍二萬餘桿輜重器械委如山積日兵乘勢蹂躪我兵死亡甚多馬毓崑整兵殿後身受槍傷完衆退出左寶貴先二日病斃至此自恐爲日軍所獲以槍自斃部卒輿尸以行中途爲日兵所劫親兵三百餘人奮勇往奪盡殲於敵我軍退至博川日兵躡追未至安州而退盛軍惟馬隊數營先走尙存餘悉潰散各營官恨怒欲殺衛汝貴經葉志超解說許補給銀四萬兩事方得已葉志超謊報